

115 年全國語文競賽臺中市複賽臺灣原住民族語言朗讀文章 【知本卑南語】 國中學生組 編號 1 號

ta kapazangalaw mena'u izu na kazu i ngidiran kanta

ulra a sasa vavayan a alrak marekaselru za i tainataw, 'ilremes zi muveruk mupatraran, remekat marengay za 'azi ku lra i uvelaliyas muruma' kanini naku 'azi kinasahar na ruma'!

saya wari kazu i patraran zemelengalengan, zi tu tiyalr savelaw lra, tu tiyalr mu keror! keror! kema maruni, maw mu intaw mu 'azi mada za paisu mupatraran, zi masamad muruma' mekan. patari 'aremeng lra mu, intaw mupana i ngidiran kanizu na menaniwan kana tuwami, tremaulr kanizu na ngulringulran mu, salaw maranger mekan za sakisiyan, maw mu kantaw zazek mu iniyan za paisuisuwa, tu la'ela'edaw tu ngalay.

izu na tawki munamun lra tu kiumalray, "vulavulayan aekan u za tuwami?" i intaw mu maira zi "en,.....maw mu 'azi ku miinada za paisu....." izu na tawki kinger mu par'a'a' likez, " ziya za eman, kuwa deruwanay u pakan!" izu na vavayan kinger kana tawki kema marengay mu, 'azi masalu kanantu tralinga, zi kemayan lra. 'azi repidan pana lra na tuwami, intaw mu pakaimaramaran mekan zi marengay kanizu na tawki, "salaw u 'inava," na tawki mu "mazu kemazu u marengay?" kema kiumalr. izu na vavayan tremungulr parevuliyas temuvang, "ai, inta 'azi ta

markanadam zi kemazu u 'inava kaninku, 'azi maresan kani nani, 'azi mazalram za ku rineangeran, ka'ilremelremes" izu na tawki mu likez ziya, "ha, vulavulayan sasaya kisiyan na tuwami ku iveray kaninu, zi kamazu u lra semungal kaninku, nu kuazu i taina na pulralrang demuru za maderu za muketrep pida 'ami, inia mu melri nu saasungalan?" izu na tawki tu kuwayaw marengay, izu na vavayan na alrak mu kamawan za masinkin lra kanatu tiya', tu matra matemuy lra za ule' zi pureule' lra, 'azi lra tu kisunavani izu na musama' na parkazuwa kisi na tuwami, payas pavekas piyaruma'. medek kana tu dadalan kana awayan kantu ruma' mu, i dawilr ziya mu mena'u lra kani tainataw, kamawan za silrevang kazu kana sulray malangalang piyaiyan ziya, payas mukepel tu anger. ulra sakuzulr, sakuzawan tu ngangai zi irayan tu kakuwa marengay kani tainataw. 'azi ziya merengay mu, mena'u kani tainataw na zuwa kitratrevunga i nganguwayan, "mukuwa u iyan para'aremeng? naku madakdakan mu uri kiyanatray ku lra! alamu! usavak savesavi nanu lima zi keraviya ta." kanini na 'esunganan mu, inia na vavayan na alrak mu tatena' mazalram lra kani tainataw tu saharan kanintaw.

重視你身邊的人

女孩跟媽吵出走，一整天在外面閒逛，肚子很餓，但沒有錢。晚上，他來到一家麵攤旁，老闆她一碗麵。女孩說：「老闆，你對我這麼好，不像我媽不了解我！」老闆笑了：「哈，小姐我不過給你一碗麵而已，妳媽媽幫妳煮了十幾年的飯，妳不是更應該感激他嗎？」老闆這麼一講，女孩有如大夢初醒，立刻飛奔回家。

才到巷口，看到媽媽焦急的在門口四處張望，還沒開口說對不起，媽媽已上前要他吃晚飯了。這天晚上，這女孩才體會到媽媽對她的愛。